



REPUBLIKA E SHQIPËRISË
AVOKATI I POPULLIT

**Mekanizmi Kombëtar për Parandalimin e Torturës,
Trajtimin ose dënimit të egër, çnjerëzor ose poshtërues**

Adresa: Bulevardi: "Zhan D'Ark" Nr.2
Tiranë, Shqipëri

Tel/Fax: +355 4 2380 300/345
E-mail: ap@avokatipopullit.gov.al
www.avokatipopullit.gov.al

Nr. **Prot.**
Nr. Dok.202200484/2

Tiranë ___/___/2022

Lënda: *Rekomandime për inspektimin e bërë në ambientet e Komisarariatit të Policisë Nr.6, Tiranë.*

Drejtuar: **Z. Alket SHATRO**
Shef i Komisarariatit të Policisë Nr.6

TIRANË

Për dijëni: **Drejtues i Parë Lorenc PANGANIK**
Drejtor i Drejtorisë Vendore të Policisë

TIRANË

I nderuar Z. Shatro,

Avokati i Popullit, në rolin e Mekanizmit Kombëtar për Parandalimin e Torturës, Trajtimin ose dënimit të egër, çnjerëzor ose poshtërues, në vijim Mekanizmi Kombëtar, bazuar në nenin 19/1 të ligjit nr. 8454, datë 04.02.1999, "Për Avokatin e Popullit", i ndryshuar, dhe nenin 81 të ligjit nr.81 datë 25.06.2020, "Për të drejtat dhe trajtimin e të dënuarve me burgim dhe të paraburgosurve" kreu një inspektim në Komisariatin e Policisë nr. 6, Tiranë.

Inspektimi u krye në datën 30.03.2022, sipas një Plani Vjetor Inspektimi të miratuar nga Avokati i Popullit. Në përbërje të grupit inspektues ishin znj. Gloria Çarkaxhiu dhe znj. Nertila Qafzezi me detyrë Nd/Komisionerë pranë Mekanizmit Kombëtar.

Inspektimi kishte si qëllim verifikimin e respektimit të standardeve të përcaktuara në ligjin nr.108/2014, "Për Policinë e Shtetit", i ndryshuar, Urdhrin e Drejtorit të Përgjithshëm të Policisë së Shtetit nr.925, datë 18.07.2019, për miratimin e procedurës standarde "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre", Urdhrin e Drejtorit të Përgjithshëm të Policisë së Shtetit nr.938, datë 24.07.2019, për miratimin e procedurës standarde "Rregullat teknike të shoqërimit në polici", si

dhe zbatimin e rekomandimeve të Avokatit të Popullit të bëra gjatë inspektimeve të mëparshme.

Avokati i Popullit, pasi u njoh me konstatimet e grupit inspektues dhe nivelin e zbatimit të rekomandimeve të lëna nga inspektimi i mëparshëm, ka detyrimin kushtetues dhe ligjor t'ju parashtrijë konkluzionet përfundimtare, duke ju referuar si më poshtë vijon:

Shënime të përgjithshme

Në përputhje me metodologjinë e zhvillimit të inspektimit në institucionet ku mbahen e trajtohen shtetas të privuar nga liria, grupi inspektues u takua me shefin e komisariatit z. Alket Shatro dhe zëvendës shefin e komisariatit z. Sokol Myrta të cilët u vunë në dijeni lidhur me qëllimin e inspektimit.

Në vijim të takimit, z. Shatro informoi grupin e inspektimit, mbi masat e marra për realizimin e rekomandimeve të lëna nga Avokati i Popullit referuar inspektimit të mëparshëm, lidhur me përmirësimin e kushteve të ambienteve të shoqërimit dhe të sigurisë të këtij Komisariati sipas procedurave standarde dhe për rritjen e performancës së punonjësve të policisë për respektimin e të drejtave ligjore të shtetasve të shoqëruar, arrestuar/ndaluar.

Grupi i inspektimit, shoqëruar nga zëvendës shefi i komisariatit vijoi inspektimin në ambientet e shoqërimit të Komisarariatit, vizitoi zyrat e punonjësve të policisë, si dhe u njoh me dokumentacionin përkatës ku pasqyroheshin veprimet e kryera me persona e shoqëruar të arrestuar apo ndaluar.

Drejtuesi dhe punonjësit në Komisarariatit e Policisë nr.6 Tiranë, me të cilët kontaktoi grupi i inspektimit, u treguan bashkëpunues gjatë gjithë inspektimit që u zhvillua ambientet e këtij Komisarariatit.

Shefi i komisariatit dhe punonjësit e policisë me të cilët kontaktoi grupi i inspektimit, u treguan bashkëpunues dhe transparentë, gjatë inspektimit në ambientet e këtij komisariatit.

Nga verifikimi i zbatimit të rekomandimeve të Avokatit të Popullit në inspektimin e mëparshëm¹, rezultoi se nuk ishte realizuar asnjë nga rekomandimet tona dhe nuk ishin bërë përpjekjet për përmirësimin e gjendjes faktike të kushteve në institucion, më konkretisht:

¹ Rekomandimi i dërguar me nr. K4/I12-2 prot., datë 29.06.2021.

1. Nuk ishte realizuar rekomandimi për marrjen e masave të menjëhershme në Komisaratin e Policisë nr.6 Tiranë, për pajisjen me orënditë e nevojshme si karrige, tavolina dhe stola si dhe lyerjen e ambienteve të dhomave të shoqërimit sikurse përcaktohet në procedurat standarde.
2. Nuk ishte realizuar rekomandimi për marrjen e masave të menjëhershme për vënien në përdorim kapaciteteve të reja në ambientet e Komisarimit të Policisë nr.6 Tiranë për marrjen në pyetje të të shoqëruarve në dhomën e ndërtuar sipas standardeve posaçërisht për intervistimin e tyre dhe dhënien fund të praktikës së dërgimit të tyre në zyrat e Oficerëve të Policisë Gjyqësore.
3. Nuk ishte realizuar rekomandimi për marrjen e masave të nevojshme për të siguruar që personat e ndaluar nga policia të jenë plotësisht të informuar për të drejtat e tyre që nga fillimi i heqjes së lirisë dhe të ndërpritet praktika e dhënies së saj pas marrjes në pyetje nga Oficerët e Policisë Gjyqësore

Në përfundim, grupi inspektimit konstatoi se, në Komisaratin e Policisë nr.6 Tiranë nuk ishin marrë masa të qënësishme për përmirësimin e standardeve lidhur me të drejtat ligjore të personave të shoqëruar, duke veçuar mos vënien në funksion të zyrës për marrjen në pyetje të të shoqëruarve dhe dhënien e kartës së të drejtave të shoqëruarve që në momentin e parë të shoqërimit në Komisarimit. Nuk kemi pasur një përgjigje zyrtare për rekomandimin e fundit dërguar pranë institucionit tuaj nëpërmjet shkresës nr. K4/I12-2 prot., datë 29.06.2021 si dhe konkretisht për planifikimin buxhetor ose masat e marra për zbatimin e tyre. Nisur nga kushtet aktuale vazhdonin të ishin të pranishme disa problematika, si më poshtë vijon:

Ambientet e shoqërimit dhe kushtet e tyre

Në Komisaratin e Policisë nr. 6, Tiranë, ambientet e shoqërimit të cilat janë ndërtuar rishtazi sipas legjislacionit në fuqi² përbëheshin nga 3 (tre) dhoma shoqërimi të ndara më vete, një dhomë për qëndrimin e personave të rritur, një dhomë për qëndrimin e grave dhe një dhomë për mbajtjen dhe shoqërimin e të miturve.

Dhomat e shoqërimit ishin sipas standardeve me sipërfaqe dhe hapësirë të bollshme për persona të shoqëruar në konflikt me ligjin, por **mungonin** orënditë në dhomat e

²Ligji Nr.108/2014, “Për Policinë e Shtetit”, i ndryshuar, dhe procedurave standarde të parashikuara në Urdhrin e Drejtorit të Përgjithshëm të Policisë së Shtetit, Nr. 925, datë 18.07.2019, “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, si dhe Urdhrin e Drejtorit të Përgjithshëm të Policisë së Shtetit Nr. 938, datë 24.07.2019, “Rregullat teknike të shoqërimit në mjediset e Policisë së Shtetit”.

shoqërimit. Pajisjet e nevojshme si tavolina dhe karrige për trajtimin dinijtoz të shtetasve të shoqëruar mungonin totalisht.

Dritaret e dhomave të shoqërimit ishin me përmasa të tilla që lejonin ajrimin e plotë dhe hyrjen e dritës natyrale. Dhomat kishin ndriçim dhe furnizim nga rrjeti elektrik. Në pjesën e jashtme, dritaret e dhomave të shoqërimit ishin të siguruar me qëllim parandalimin e largimit apo arratisjes së personave të shoqëruar në këto mjedise.

Në ambientet e shoqërimit gjendej një dhomë e veçantë për marrjen në pyetje/intervistimin e personave të shoqëruar, e cila ishte e pajisur me tavolina, karrige dhe stola për qëndrimin ulur të shtetasve të shoqëruar, si dhe me orenditë e nevojshme si karrige dhe tavolina pune për specialistët e policisë dhe ishin të instaluar kamerat e monitorimit, por dhoma nuk përdorej në punën e përditshme.

Në hyrje të ambienteve të dhomave të shoqërimit, gjendej dhe një dhomë për njohje në interes të hetimit të personave të shoqëruar në konflikt me ligjin. Dhoma ishte e pajisur me tavolinë karrige dhe monitoruar me kamera.

Mjedisi dhe dhomat e shoqërimit edhe pse ishin të reja³ dhe përgjithësisht të mirëmbajtura dhe të pastra nga ana higjiene-sanitare, kishin nevojë urgjente të lyheshin. Në hyrje të korridorit të dhomave të shoqërimit ndodheshin dy tualete, të ndara më vete për gra dhe burra sipas standardeve të miratuara. Ato ishin të pastra dhe të pajisur me dushe, lavaman dhe ujë të rrjedhshëm 24 orë, korridoret dhe dhomat e shoqërimit ishin të monitoruara me kamera. Po ashtu, dhomat e shoqërimit si dhe godina e Komisarariatit të Policisë nr. 6 Tiranë, kishte sistem qendror ngrohje/ftohje.

Godina e Komisarariatit nr.6 Tiranë, si ambientet e brendshme dhe në pjesën e jashtme të saj, ishte survejuar nga sistemi i kamerave përgjatë 24 orëve. Gjatë inspektimit, u konstatua se në këtë komisarariat zbatoheshin detyrimet ligjore të parashikuara në nenet 109 paragrafi 5⁴ dhe 122 paragrafi 5⁵ e ligjit nr. 108/2014 “Për Policinë e Shtetit”, i ndryshuar, si dhe në Kapitullin VIII, pika a.3.4⁶ të procedurave standarde

³ Komisaritati nr. 6 Tiranë është rikonstruktuar më 11.01.2019.

⁴ Neni 129 paragrafi 5 i Ligjit nr. 108/2014 “Për Policinë e Shtetit”, i ndryshuar parashikon se: “Punonjësi i policisë, dokumenton në proces-verbal veprimet e kryera me personin e shoqëruar. Procesverbali nënshkruhet në fund të çdo flete nga punonjësi i policisë që ka kryer veprimet dhe personi i shoqëruar. Një kopje e procesverbalit i vihet në dispozicion personit të shoqëruar.”

⁵ Neni 122 paragrafi 5 i Ligjit nr. 108/2014 “Për Policinë e Shtetit” i ndryshuar parashikon se: “Veprimet e mësipërme për marrjen e masave mbrojtëse ndaj personave të parashikuar në këtë dispozitë, dokumentohen në procesverbal. Procesverbali nënshkruhet në fund të çdo flete nga punonjësi i policisë që ka kryer veprimet dhe personi/at që kanë qenë të pranishëm gjatë kryerjes së këtyre veprimeve. Një kopje e procesverbalit i vihet në dispozicion personit, ndaj të cilit janë marrë masat mbrojtëse, ose familjarit/kujdestarit të tij.”

⁶ Urdhër, nr. 938 datë 24.07.2019 “Procedura standarde e punës për: “Rregullat teknike të shoqërimit në mjediset e Policisë së Shtetit” a.3 - Proces verbali i veprimeve të kryera me personin e shoqëruar: a.3.4

për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimit të çështjes përkatëse.

Në Komisariatit e Policisë nr.6 Tiranë, gjatë periudhës 01.01.2022 deri më 30.03.2022 ishin të shoqëruar, të ndaluar apo të arrestuar dhe të evidentuar në regjistrin e shoqërimit **188** persona, sipas përcaktimeve të bëra në nenin 109 dhe 112 paragrafi 1 të ligjit nr. 108/2014 “Për Policinë e Shtetit” i ndryshuar. Në momentin e inspektimit nuk kishte asnjë shtetas në dhomat e shoqërimit.

Gjithashtu, na informuan se personat e shoqëruar nga policia janë të informuar për të drejtat e tyre, që nga fillimi i privimit të lirisë, duke siguruar informacion të qartë verbal në lidhje me të drejtat ligjore/procedurale që ata kanë. Përsëri nuk u jepej karta e të drejtave siç dhe parashikohet nga legjislacioni i procedurës penale. **Mekanizmi Kombëtar** sugjeron dhënien e kartës së të drejtave në formë shkresore që në momentin e hyrjes në Komisariat⁷.

Duke qenë se sa më sipër është rekomandimi i bërë nga KPT dhe i përsëritur nga Mekanizmi Kombëtar në disa raporte inspektimi të Avokatit të Popullit, shpreh keqardhjen e thellë për mosplotësimin e këtij standardi e detyrimi ligjor.

Regjistri i personave të shoqëruar, ndaluar/arrestuar dhe evidentimi i tyre

Gjatë inspektimit u konstatua se në Komisariatit nr.6 Tiranë, “Regjistri i evidentimit të të dhënave për personat e shoqëruar” ishte plotësuar në zbatim të ligjit nr.108/2014 “Për Policinë e Shtetit”, i ndryshuar, sipas tipit “Model nr.1”, konform procedurave standarde “Rregullat teknike të shoqërimit në polici”, miratuar me Urdhrin nr.938 datë 24.07.2019 e Drejtorit të Përgjithshëm të Policisë së Shtetit dhe ishte i sekretuar.

Personat e shoqëruar në mjediset e policisë, sipas dispozitave të ligjit nr. 108/2014 “Për Policinë e Shtetit”, i ndryshuar, regjistroheshin në këtë regjistrë nga punonjësit e zyrës së informacionit. Nga këqyrja e këtij regjistri rezulton se koha e qëndrimit

“Procesverbali hartohet në dy kopje, një kopje e procesverbalit i jepet detyrimisht personit të shoqëruar dhe kopja tjetër dorëzohet në sekretari/arshivën e njësisë policore.”

⁷ CPT u bën thirrje autoriteteve shqiptare të ndërmarrin hapa për të siguruar që personat e ndaluar nga policia të jenë plotësisht të informuar për të drejtat e tyre që nga fillimi i heqjes së lirisë (domethënë, nga momenti kur ata janë të detyruar të qëndrojnë në polici).

Kjo duhet të sigurohet me dhënien e informacionit të qartë verbal që në fillim, për t'u plotësuar në rastin më të shpejtë (domethënë, menjëherë pas mbërritjes në ambientet e policisë) me sigurimin e fletës së informacionit të lartpërmendur. Personave në fjalë duhet t'u kërkohet të nënshkruajnë një deklaratë që vërteton se ata kanë marrë një kopje të fletës së informacionit.

Raporti CPT-së për Shqipërinë CPT/Inf (2019) 28 [par.24]. Konsulto: <https://rm.coe.int/168097986b>.

në gjendje shoqërimit të shtetasve ishte e ndryshme nga 1 deri 10 orë në raste të veçanta. Rubrikat e regjistrit ishin të plotësuar në mënyrë korrekte, me përgjegjësi dhe saktësi në momentin e shoqërimit të tyre në organin e policisë.

Në këtë Komisariat kishte regjistër për personat e arrestuar/ndaluar, ku evidentoheshin të gjitha rastet e ndalimeve dhe arrestimeve të kryera nga punonjësit e këtij organi, i cili ishte sekretuar. Nga këqyrja e këtij regjistri rezultoi se në rastet e arrestimeve dhe të ndalimeve të personave të shoqëruar, ora e arrestimit/ndalimit përputhej me orën në momentin e shoqërimit të tyre në organin e policisë.

Gjithashtu, në këtë Komisariat administrohej regjistër për të miturit të shoqëruar në konflikt me ligjin ku evidentoheshin të gjithë rastet e të miturve të shoqëruar në këto ambiente, në të cilin u konstatua se të gjithë rubrikat e regjistrit ishin plotësuar në mënyrë korrekte dhe regjistri ishte i sekretuar.

Ndërkohë u konstatua se në këtë komisariat kishte edhe regjistër për evidentimin e kërkesë/ankesave të personave të shoqëruar, të arrestuar dhe të ndaluar, sikurse parashikohet në nenin 115 “*Kërkesë/ankesat e të shoqëruarve, të ndaluarve dhe të arrestuarve*” të ligjit nr. 108/2014 “Për Policinë e Shtetit”, i ndryshuar, por nuk ishte evidentuar asnjë kërkesë apo ankesë.

Ambientet e sigurisë/kushtet e tyre dhe trajtimi i të ndaluarve/arrestuarve dhe i të shoqëruarve.

Në Komisariat e Policisë nr.6 Tiranë, nuk kishte ambiente sigurie. Personat të arrestuar/ndaluar, pasi përfundonin veprimet procedurale nga punonjësit e policisë, dërgoheshin në dhomat e sigurisë së Drejtorisë Vendore të Policisë Tiranë (DVP).

Ambientet e intervistimit

Në Komisariat e Policisë nr. 6 Tiranë, kishte ambiente të reja të shoqërimit, dhe mjedise të përshtatshme më vete për marrjen në pyetje apo intervistimin e personave të shoqëruar nga specialistët dhe ndihmës specialistët e policisë së këtij komisariati. Ky ambient, edhe pse i krijuar sipas standardeve dhe ishte i monitoruar me kamera për vëzhgim gjatë kryerjes së veprimeve procedurale nga punonjësit e policisë, përsëri mbetej i pa shfrytëzuar.

Krijimi i zyrave të veçanta ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra, është rekomandim i Avokati i Popullit referuar standardeve

ndërkombëtare⁸, të cilat e konsiderojnë procesin e monitorimit filmik si një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve e arrestuarve, ashtu dhe nga vetë punonjësit e Policisë së Shtetit. Ky standard ka gjetur rregullim edhe në procedurën standarde të miratuar me Urdhrin e Drejtorit të Përgjithshëm të Policisë së Shtetit nr. 925, datë 18.07.2019, *“Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*, duke u shndërruar në rregull të detyruar për punonjësit e policisë.

Theksojmë se vijon të mbetet shqetësuese ndjekja e praktikës së marrjes në pyetje të të shoqëruarve në zyrën e punës së specialistit/oficerit të policisë gjyqësore në Komisaratin nr. 6. Një praktikë e tillë bie ndesh edhe me Urdhrin e mësipërm të Drejtorit të Përgjithshëm të Policisë së Shtetit nr. 925, datë 18.07.2019, i cili në pikën 5 *“Rregullat e sigurisë gjatë marrjes në pyetje/intervistim dhe takimeve të ndryshme me të arrestuarin/ndaluarin”* parashikon veçanërisht kryerjen e kësaj procedure në një ambient të posaçëm siç është dhoma e intervistimit/marrjes në pyetje.

Nga monitorimi i disa prej zyrave të punonjësve të policisë, nuk u gjetën sende, prania e të cilave të ekspozonte dhunë tek personat me të cilët ata kryenin veprime procedurale.

Ndihma juridike, psikologjike dhe kujdesi mjekësor

Në këtë Komisarariat zbatohet detyrimi ligjor i parashikuar në nenet 109 paragrafi 5 dhe 122 paragrafi 5 e ligjit nr. 108/2014 *“Për Policinë e Shtetit”*, i ndryshuar, si dhe në Kapitullin VIII, pika a.3.4 të procedurave standarde për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimit të çështjes përkatëse.

Nga pyetja e punonjësve të policisë rezultoi se në rastet kur të ndaluarit/arrestuarit madhorë të cilët nuk kishin mundësi financiare për të pajtuar avokat privat dhe

⁸ *“Një sistem i monitorimit të vazhdueshëm i standarteve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohet që të regjistrohet në mënyrë sistematike koha kur ka filluar dhe mbaruar intervista, ndonjë kërkesë të bërë nga i ndaluari gjatë intervistës, si dhe të personave të pranishëm gjatë çdo interviste.”* Raporti i CPT-së për Armeninë: CPT/Inf (2016) 31 [par.20].

Konsulto:

<https://rm.coe.int/CoERMPublicCommonSearchServices/DisplayDCTMContent?documentId=09000016806bf46f>

kërkonin ndihmë juridike, atyre iu sigurohej avokatë nga lista të dërguar nga Prokuroria e rrethit Gjyqësor Tiranë.

Në rastet kur të ndaluarit/arrestuarit ishin të mitur, veprimet procedurale kryheshin në praninë e detyrueshme të avokatit mbrojtës të caktuar kryesisht dhe të psikologut që ofrohej menjëherë nga DVP Tiranë. Në Komisarlatin nr. 6 mbahej regjistër i veçantë për evidentimin e të dhënave për personat e shoqëruar të mitur dhe deri në ditën e monitorimit ishin shoqëruar gjithsej 20 të mitur përgjatë vitit 2022.

Gjatë inspektimit u konstatua se në korridoret e godinës të këtij komisarlati ishin afishuar postera me të drejtat ligjore të personave të shoqëruar në organin e policisë dhe mund të jetë e aksesueshme nga të shoqëruarit në mjediset e policisë ose t'u jepet në hyrje një kopje. Posterat duhet të vendosen në ambientet e shoqërimit pasi përgjatë kalimit në koridor nuk garantohet leximi dhe kuptimi i tyre nga të shoqëruarit.

Për sa më sipër dhe me qëllim zgjidhjen e problemeve të konstatuara gjatë këtij inspektimi, bazuar në pikën 3 të nenit 63 të Kushtetutës ku parashikohet se: *“Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike”* dhe në bazë të nenit 21/b të ligjit nr. 8454 dt.04.02.1999 *“Për Avokatin e Popullit”*, i ndryshuar, ku përcaktohet se: *“Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive”*,

REKOMANDOJMË:

1. Marrjen e masave për moszbatimin e rekomandimeve të përsëritura të Avokatit të Popullit duke nxjerrë përgjegjësinë e drejtuesve përgjegjës.
2. Marrjen e masave të menjëhershme në Komisarlatin e Policisë nr.6 Tiranë, për pajisjen me orënditë e nevojshme si karrige, tavolina dhe stola si dhe lyerjen e ambienteve të dhomave të shoqërimit sikurse përcaktohet në procedurat standarde.
3. Marrjen e masave të menjëhershme për vënien në përdorim kapaciteteve të reja në ambientet e Komisarlatit të Policisë nr.6 Tiranë për marrjen në pyetje të të shoqëruarve në dhomën e ndërtuar sipas standardeve posaçërisht për intervistimin e tyre dhe dhënien fund të praktikës së dërgimit të tyre në zyrat e Oficerëve të Policisë Gjyqësore.

4. Të ndërmarrin masat e nevojshme për të siguruar që personat e ndaluar nga policia të jenë plotësisht të informuar për të drejtat e tyre që nga fillimi i heqjes së lirisë dhe të ndërpritet praktika e dhënies së saj pas marrjes në pyetje nga Oficerët e Policisë Gjyqësore.

Për qëndrimin dhe masat që do merrni në zbatim të këtij rekomandimi, të vihemi në dijeni brenda afatit 30 ditor sipas nenit 22 të ligjit nr.8454, datë 04.02.1999 “Për Avokatin e Popullit”, i ndryshuar.

Duke besuar në mirëkuptimin dhe bashkëpunimin tuaj,

KOMISIONER

Ahmet PRENÇI